

Visoki predstavnik odao poštu žrtvama u Srebrenici

Christian Schwarz-Schilling danas je po prvi put u svojstvu visokog predstavnika i specijalnog predstavnika Evropske unije posjetio Spomen obilježje u Srebrenici, kako bi odao poštu žrtvama srebreničkog masakra.

“Ovo je za mene lično važna posjeta,” rekao je visoki predstavnik. “Sjećanje na ono što se ovdje dogodilo nije nešto što se radi samo jednom godišnje, kada se dođe u posjetu Srebrenici.”

Rekavši da “Spomen obilježje i mezarje u Srebrenici omogućava onima koji su izgubili svoje najmilije da ih dostojanstveno ukopaju,” visoki predstavnik je također ponovio činjenicu da “moramo osigurati da odgovorni za ove zločine dođu pred lice pravde.”

Prvog juna ove godine visoki predstavnik se u Sarajevu susreo sa predstavnicima udruženja porodica srebreničkih žrtava. Na tom sastanku visoki predstavnik je obećao da će na sastanku u Srebrenici okupiti sve relevantne faktore.

Danas se u Srebrenici visoki predstavnik susreo sa predstavnicima udruženja porodica žrtava, predstavnicima Fondacije “Spomen obilježje i mezarje Srebrenica-Potočari”, Ministarstva za ljudska prava i izbjeglice BiH, Ministarstva za izbjeglice i raseljena lica RS, opštinskih vlasti Srebrenice i Ureda ombudsmena RS.

“Cilj mog dolaska ovdje je da se upoznam sa problemima sa kojima se suočavaju obični ljudi te da mi nadležne institucije predoče svoje ideje o tome kako riješiti ta pitanja”, rekao je visoki predstavnik.

Učesnici današnjeg sastanka su se složili da izrade nacrt akcionog plana za rješavanje pitanja povratka u Srebrenicu, koji će koordinirati opštinske vlasti u Srebrenici, te odgovarajuće institucije na entitetskom i državnom nivou. Akcioni plan, koji treba biti predstavljen do 1. avgusta, pozabaviće se prioritnim problemima srebreničke regije u 2006. te u vremenu do 2010. godine. "Probleme moramo rješavati, a ne samo govoriti o njima", rekao je visoki predstavnik.

"Odgovorne pojedince i institucije pozivam da odgovore na postavljena pitanja i predlože rješenja", rekao je visoki predstavnik. "Vodeći političari bi učinili dobro da posjete posebna područja, kao što je Srebrenica, kako bi razumjeli stvarne probleme sa kojima su ljudi suočeni, radije nego da skupljaju jeftine političke poene uoči izbora".

Prije ovog sastanka visoki predstavnik se sastao sa povratnicima u opštinu Srebrenica.